



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir\_yimyim



tir yimyim

TAPAK 7

**Ricky Ponting Punjab Kings head coach kumogo**

**North Korea-i ano short-range ballistic missiles tendang**

VOL. XXI ISSUE NO. 337 (ADOK 337) DIMAPUR YANGTEPNÜ (THURSDAY) RONGJUI (SEPTEMBER) 19, 202 ₹ 5.00

## Union Finance Minister-i NPS Vatsalya tenzüksüogo

**Dimapur, September 18, 2024 (TYO):** September 18, 2024 nü SLBC aser NABARD yaritepa video conference ajanga New Pension Scheme - NPS Vatsalya sayaba sentong ayonga agiogo.

Iba sentong ya State Level Bank Committee office, Kohima nung agi aser tanü Union Minister of Finance and Corporate Affairs Nirmala Sitharaman-i tesem 75 nung video conference ajanga NPS Vatsalya scheme tenzükja liasü.

Nirmala Sitharaman-i Budget 2024 session nung tsuraburtem aser guardian ajanga tanurtem asoshi pension scheme ka benoka liasü.

Iba scheme ajanga tanurtemi pension atema senotsü rizüngtsü aser parnok arishi kum tasazük ka ajungba sülen iba ya regular account ama melentetsü akok.

NPS Vatsalya scheme ya Pension Fund Regulatory and Development Authority (PFRDA) ajanga ketdangtsü.

NPS Vatsalya account ya kumshia teküpoktiba agi Rs 1,000 enoka lapoktsü akok.

Iba scheme tenzükba sentong ya state aser Union Territory ajak nung State Level Bankers' Committee-i NABARD den yaritepa agiogo aser arishi kum 8-18 tsungda kaketshirtem asoshi tenzüksü.

## NLA Speaker-i Indian Youth Parliament nung aden

**Dimapur, September 18, 2024 (TYO):** Nagaland Legislative Assembly Speaker Sharingain Longkumer-i Indian Youth Parliament tembangba sentong nung denogo.

Iba sentong ya Jaipur, Rajasthan nung September 17, 2024 nü agia liasü aser Speaker Sharingain-i lanurtem ayongzuka jembu.

Sharingain-i "Empowering the next generation" onük jembidang

lanurtemi linük tarutsü yangerba nung shilem agiba aser lanurtem tashi itdaksüba ajanga terenlok tajung anguba indang lemsatop.

Paisa lanurtem dang pei nukjidong nung akangakanga noktaksü aser ochishia alitsüba den tashi angatsü tayongzükba agütsü.

Sharingain-i lanurtem dang tangatetba shitak nung noktaksü aser tajung ka atema bendanga agütsü ayongzük.

## Mkg DC-i NH 702D atema metetdaksür

**Dimapur, September 18, 2024 (TYO):** Mokochung nungi Mariani tashi NH 702D nung khu taret abenba garitem mesenzüi atatsü tetuyuba ka agütsüogo.

Iba lenmang 2-Lane NH ama meyangu tashi lisem tai abenba trucks/dumper garitem senzütsü memelar ta Mokochung Deputy Commissioner Thsuvisie Phoji-i metetdaksü.

## Rashtrapati Nilayam nung NE sobaliba sayutsü

**Guwahati, September 18, 2024 (Agencies):** Rashtrapati Nilayam (President's House)-i Ministry of Development of North Eastern Region (DoNER) aser Ministry of Culture den yaritepa mezungbuba 'Bharatiya Kala Mahotsav' ayongha agütsü.

Iba sentong ya September 29 nungi October 6, 2024 tashi alitsü aser September 28, 2024 nü President Droupadi Murmu-i mahotsav lapoktsü.

Anogo ti benjungmong nung Northeastern state tem nung sobaliba senmang takar sayutsü.

Iba benjung nung Northeastern state 8- Assam, Arunachal Pradesh, Manipur, Meghalaya, Mizoram, Nagaland, Tripura aser Sikkim indang teka mapa, sobaliba aser achiajem balala angutsü.

State 8 nungi artists aser artisans 300 temai 'Bharatiya Kala Mahotsav' nung shilem agütsü.

September 29 nungi October 6, 2024 tashi anepdang 10:00 ako

nungi aonung 8:00 ako tsungda nübortemi mahotsav semdangtsü akok aser iba atema https://visit.rashtrapatibhavan.gov.in. nung slot mekazuka ayutsü akok.

Iba mahotsav telungi angati dang aita daksütsü aser Telangana kübok Secunderabad nung aliba Rashtrapati Nilayam nung tesemdangertem asoshi on-the-spot booking facility alitsü.

Rashtrapati Nilayam dang taoba nung Residency House ta ajar aser iba ya India President atema official winter retreat lir.

India nung Presidential retreats asem dang aliba nung Rashtrapati Nilayam ya ka lir aser March 2023 nung iba ki public asoshi lapoktsü. Iba kidang India President-i asükwa hopta ana shi alir aser ano bendangertem arudang guest house ama amshir.

Rashtrapati Nilayam ya 1860 nung ali acre 90 nung yanglu aser India nüjiso anguba sülen Nizam of Hyderabad-i atsünga agi.

## World Bamboo Day nung Nagaland Bamboo industry ajungkettsü nangzük



**Dimapur, September 18, 2024 (TYO):** Alima den külemi Nagaland nunga 'Next Generation Bamboo: Solution, Innovation and Design' omen nung ajemdaker Bodbarnü World Bamboo Day ayongzuka mongogo.

Iba sentong ya Nagaland Bamboo Development Agency (NBDA)-i Nagaland Bamboo Resource Centre, Chumoükedima nung ayongzuka agiogo.

"Meta talang pilar aliba yimsüngtem nungi teka mapa inyaktermi bamboo crafts aika yangluteter. Parnok nem skilling development training agütsüra parnoki yanglutetba osettsüset global market nung toktepa amshitetsü" ta NBDA Chairman Nuzota Swuro-i ashi.

Asenoki teka mapa inyakternem nem training shitak agütsüra parnoki mapa tajungba inyaktetsü aser rongsenketzung jenjang ajungkettsü ta pai ashi.

"Nagaland nung Chumoükedima, Dimapur aser Peren district tem ya 'bamboo economic zone' ama züngoka lir aser NBDA-i maneni iba zone nung aou atemba mapa nung temulung agütsütsü. Tarutsü anogotem

industrial units amenoktsü aser tenemlen tayongzükbatem koktettsü atema cluster units dena common facility centre tilala lapoktsü sentong lir" ta NBDA Chairman-isa metetdaksü.

NBDA-i Nagaland nung aou tapu 46 jangjateta lir aser itemji lab test aser analysis asütsü tebilemba lir. Iba ajanga teka mapa inyaktermi aou tapu balala metettsü ta paisa ashi.

"Nisungtemi Bamboo industry ya teburtem atema dang ta bilemer saka takok tulu anguba entrepreneurs ji tetsür teka mapa inyaktertem lir. Tetsürtem dak purapitettsü aser anukanüka yanglutsü sempet keta lir aser iba ajanga parnoki mapa tajungba inyakteter. Anungji teka mapa inyakba tetsürtem nem skill development aser senotsü teyari agütsütsü" ta Nuzota Swuro-i ashi.

Neiphiu Rio lenisüba kübok NBDA team-i State Bamboo Mission temaba jenjangi ajungkettsü teimla lir ta paisa ashi.

"Taküm omen ajanga tanü putu nung aou tajungba amshitsü nungdakba nenshir. Iba omen ajanga aou tajungba amshitsü atema purapitettsü aser design

tasentem yanglutetsü ajungmesor" ta NBDA Team Member Dr. Tolto Metha-ia ashi.

NBDA-i bamboo industry tuluka ajungkettsü sentong lir aser iba ya schemes o programmes balala ajanga inyakttsü. Iba mapa takok ngudaktsütsü asoshi entrepreneurs-i tongti shilem agütsü ta pai ashi.

NBDA-i Nagaland Bamboo Resource Centre nung 'art cane and bamboo technology park' tajung ka teyangludak lir.

"Aou ya alima tarutsü atema süngdonglidong ka lir aser asenoki aou tashi amshitetsü atema külemi lenmangtem bushitepsüla" ta NBDA, Mission Director Albert Ezung-ia ashi.

Iba sentong nung Aosanen nem Bamboo Entrepreneur Award 2024 agütsü. Iba sempet ya bamboo craft nung bendanga agütsüba aser osettsüset tasen purapiteta yanglutetba atema agütsür.

Tanü workshop session ana agidang Urta Designs & Objects nung Cane concept Founder Aku Zeliang aser Bamboo Architect (Zynorique Initiatives Society) Richard Belho nati shisalen kar sayua liasü.

## Arunachal kaketshirtemi Gau Dhvaj Stapna rally magizük

**Itanagar, September 18, 2024 (Agencies):** Arunachal Indigenous Students' Union (AISU)-i Arunachal Pradesh Home Minister dangi Itanagar nung Gau Dhvaj Stapna, Bharat Yatra rally agütsü aliba anema shidi ka züluogo.

September 7, 2024 nü Arunachal Press Club nung Swamiji kar aser putirtemi Jagadguru Shankaracharya tenüng nung osangbener senden ka ayonga agiogo ta AISU-i ashi.

"Gau Dhvaj Stapna, Bharat Yatra rally nung akhangba onüktem ya Arunachal Pradesh nung lisopurtem shia külemküjaba, inyaksangshi aser tamangba anema lir. Ozü lisopurtem atema nashi ya kanga tongtipang lir aser chiyungtsü, benjung aser külemküja atema metsür. Alemlü nungi onoki nashi tepsetba ya benshia arur" ta AISU-i ashi.

Jagadguru Shankaracharya

tenüng nung iba rally ayongertem onoki magizük aser ozü temeten, külemküjaba, tamangba aser inyaksangshi dak kongshitsüsa inyakba mapa onoki kodanga magizüktsü, ta parnokisa ashi.

AISU-isa bangdakpurtem dang rally agütsü temelaba agütsüja lira meyipa agütsü mesüra magütsütsü ayongzükogo.

Gau Dhvaj Stapna, Bharat Yatra rally ayongertem dak ozüng kübok tapet mapa inyakttsüla aser Arunachal Pradesh nung lisopurtem anema mapa inyakba noktangtsüla ta AISU-isa ketdangsurtem dang shiogo.

All Arunachal Pradesh Students' Union (AAPSU)-ia Itanagar Capital Region nung Deputy Commissioner dang September 27, 2024 nü Itanagar nung Jagat Guru Shankaracharya ajanga rally agütsü ayongba asoshi temelaba magütsütsüla ta

shidi ka züluogo. Arunachal Pradesh nung lisopurtem sobaliba, inyaksangshi aser taginübatem küzmüka ayutsü atema iba rally magidaktsütsüla kechiyong iba sentong ajanga mepetmesü adoktsü akok ta AAPSU-i shidi nung shia lir.

Arunachal Pradesh ya lisopurtem state ka lir aser sobaliba senmang balaka den libaliro, achiajem aser inyaksangshi tangar dang nungi khenyongi balaka. Iba ya Bengal Eastern Frontier Regulation (BEFR) of 1873 ama temzüng balala ajanga küzmüka lir, ta AAPSU-isa metetdaksü.

"Lisopurtem achijemba aser inyaksangshi melenshidaktsüba mesüra aitsüba ajanga mepetmesü adoktsü akok aser law & order tebilemstütem ajurutsü akok. Anungji ibala mesükba sayutsüngiba sentongtem magidaktsütsüla" ta parnokisa shidi nung shiogo.

### KMC-i Kohima nung mürekmeju sentong ayongzük



**Dimapur, Rongjui/Sept. 18 (TYO):** Kohima Municipal Council (KMC) ajanga "Clean Habits, Clean Values" omen nung ajemdaker Swachhata Hi Seva (SHS) 2024 campaign nung shilem ka ama mürekmejuba sentong ka September 18, 2024 nü ayongzükua liasü.

Iba mapang Old MLA

Junction nungi Razhü Point tashi nüburtemi tejangraba tulu nung mürekmejua liasü. KMC Chairperson, Neikhozo Suokhrie ajanga SHS 2024 campaign semzüksü aser mapang shia nüburtemi shilem agia mürekmejutsü tongtipang lir ta ashi.

Iba sentong nung shilem

agirtem den Chief Executive Officer, KMC, T Lanusenla Longkumer-i SHS Oath agia liasü.

Laisa tang tashinung inyaka aruba indang lemsatop aser nüburtem dang pei ward, colony aser mapa inyakba tesemtem nunga mürekmeju sentong agitsü ajungshia liasü.

### Kohima DPDB senden nung Village Adoption Committee indang jembi

**Dimapur, Rongjui/Sept. 18 (TYO):** Ita shia amenba Kohima District Planning & Development Board (DPDB) senden September 17, 2024 nü DPDB Conference Hall, Kohima nung Deputy Commissioner & Vice Chairman DPDB, Kohima, Kumar Ramnikant IAS lenisüba kübok mena liasü.

Iba senden nung Kohima DPDB Chairman & MLA Dr. Tseilhoutuo Rhütso aser MLA Kevipodi Sophie nungeria dena liasü.

Iba senden nung DC ajanga taoba senden nung lemtetba lepa reprangshi aser lemteta aliba maparen ajak renema inyakogo

ta metetdaksü. Iba mapang Sericulture Board, Nagaland indang society registration proposal agienba indanga metetdaksa liasü.

Heartshome Pre-school (New Police Reserve, Phesama) aser Wonderbeats Pre-school (Upper PWD Colony, Kohima) ya primary level-i ajungkettsü atema senden nung agizük.

Iba proposal anaprong ya Sr. SDEO Kohima ajanga benok aser iba den nungdakba documentation aser verification report tem agüja Board-i tim ketdangsü dangi nungdakba mera agitsü yoka liasü.

House-i Village Adoption

Committees aser LADP Verification Committees for 2024-25 tentetsü mulunga agizük.

Village Adoption Committee atema core committee ka shim aser yangji ADC Headquarters ya Convenor asütsü aser District Planning Officer aser District Public Relations Officer züngsem asütsü lemtet.

Taruba DPDB senden nung Urban Development Department aser Rural Development Department dang par department inyakyim PowerPoint presentation agütsütsü nunglokja senden tembang.

### Kisama nung mürekmejuba sentong ayongzük



Naga Heritage Village, Kisama nung September 18, 2024 nü Swachhata Hi Seva 2024 sentong agidang tangokba noksa ka nung Principal Secretary PHED, E. Mhonbemo Patton, IAS, ketdangsür aser volunteers tem angur.

**Dimapur, Rongjui/Sept. 18 (TYO):** Swachhata Hi Seva 2024 nung shilem ka ama Naga Heritage Village, Kisama nung September 18, 2024 nü mürekmejuba sentong ka agia liasü.

Iba sentong ya PHED, Kohima Rural/Urban Division ajanga Phesama Village Council aser Kigwema Village Council den lungjemer ayongzükua liasü.

Principal Secretary PHED, E. Mhonbemo Patton, IAS ajanga iba sentong ayongzükba nükjidong lemsatop aser tesem kar nung tali rangloksü atema shim aser yangji Kisama ya ka lir, ta ashi.

Iba inyakyim nung yaritepba atema Phesama aser Kigwema yimtsüngtem dang pelaba ashi aser Hornbill Festival tashi shilem tajung agitsü imlaa atar, ta pai

ashi. Lhousikhono Zinyu-i anir Swachhata Pledge agi aser iba sülen volunteers temi Mass Shramdaan (segregation of plastic wastes) inyaka liasü.

Iba sentong ya IEC & WASH Consultant PHED Kohima, Urban Division, Vibou Seyie lenisüba kübok agi aser Phesama Village Council chairman Bizo M ajanga melepzüng o jembia liasü.

### ICDS Project Longleng ajanga cooking competition ayongzük

**Dimapur, Rongjui/Sept. 18 (TYO):** ICDS Project Longleng ajanga Longleng District kübok Yachem village nung September 18, 2024 nü cooking competition cum anaemia camp ayongzükua liasü.

Iba sentong moaja EAC, C. Tsalimse Sangtam aden aser pai

iba sentong takok ngua agitetsü atema nübur ajunga dang lungjemer shilem agitsü ayongzükua liasü.

Kasa mapang anaemia camp ya Medical Officer, CHC, Yachem, Dr. Visino Nakhro lenisüba kübok agi, kong nisung 60 dak tema dena liasü.

### Tseminyu nung cooking competition ayongzük



**Dimapur, Rongjui/Sept. 18 (TYO):** CDPO Tseminyu ajanga BDO Office, Tseminyu nung September 18, 2024 nü block-level cooking competition ayongzükua liasü, kong sentong akhumdong ama EAC (Dev) Tseminyu, Molosangla Ozukum dena liasü.

Iba sentong nung EAC Molosangla Ozukum-i CDPO Tseminyu aser staff nem iba ama sentong tajung ayongzükba atema tenüngsang agütsü.

Pei sempet sayutsü asoshi tarutsü anogotem nung sapang tuluba kumdakja stakeholders tali dendaktsütsü lai ashi.

Tebur temia sorochiok ashitsüla, ta lai ashi.

Iba sentong nung Hannah Lorin menden liasü aser Obed Magh, Sr. Supervisor CDPO office Tseminyu ajanga tarur pela agizükba o jembi aser Allen Seb, Block Coordinator Tseminyu ajanga melepzüng o jembia liasü.

Tetoktepba nung takok angur nem sentong akhumdong ajanga sempet agüja liasü, kong Tseminyu Town mezüngbuba jenjang, Chunlikh tanabuba jenjang aser tasembuba jenjang Tsokhinsin & Phenda Village ajanga ngua liasü.



Pherima village nung September 3, 2024 nü alinen aluba lendong nung asüba kinunger nem September 18, 2024 nü ADC Chümoukedima, Dr. Kuzonyi Wideo aser DDMA ketdangsür temi teyari sen (Ex-gratia) amoktsüdang tangokba noksa nung angur.

### State nung private school 13 shibanger

**Dimapur, Rongjui/Sept. 18 (TYO):** State Level Education Committee (SLEC) senden December 15, 2023 nü amendang telemtetba agiba ama aser District Administration tem

nungi No Objection Certificates (NOCs) agütsüba sülen Private School 13 shibangba metetdaksür, ta School Education sangdong ka ajanga ashi.

#### Private Schools 13 ji itemi alitsü:

Sl No.	Name of School	District
1	Pinewood School	Kohima
2	ScolaLojes	Kohima
3	East View Home School	Kohima
4	Assemble of God High School	Kohima
5	C.D King School Jotsoma	Kohima
6	King David School Pfutsero	Phek
7	Logos Home Academy	Mokokchung
8	Imsutemjen memorial High School	Mokokchung
9	Christ King School	Longleng
10	Public School Tohoi Village	Niuland
11	Zion School Kacharigaon	Dimapur
12	Little Star School Aizuto	Zunheboto
13	Christian School Aizuto	Zunheboto



September 18, 2024 nü Lucknow nung Uttar Pradesh Congress Committee Tir, Ajay Rai aser party MP, Kishori Lal Sharma na den party nung inyakertemi, state sorkari tensa mazüokteter ta aija longkak aitdang tangokba noksa nung angur.

### Union Cabinet-i 'One nation, one election' report agizükogo

New Delhi, Rongjui/ September 18 (Agencies): Bodhbarnü BJP-i aniba NDA sorkari 'one nation, one election' mapa küma benoktsü atema mera ka agia Union Cabinet-i Ram Nath Kovind-i aniba committee-i benokba report agizükogo.

Taoba mapang linük Tir, Ram Nath Kovind-i aniba committee-i taküm March ita nung Tir, Murmu nem committee report agüja liasü.

Union Cabinet nung iba report agizükba atema tenüngsang agüja Ato kilonser, Narendra Modi-i, iba ya ajanga India nunger democracy ano tajungba akümtsü, ta ashi.

Committee-i Lok Sabha elections aser state assemblies elections külemi mapang ka nung dang agitsü, iba sülen anogo 100 tsüngda municipalities aser panchayat election agitsü benoka lir.

Tesüiba mapangtem nung Lok Sabha election den külemi state aika nung assembly elections agia aruogo. 1967 küm nungbo Lok Sabha election den külemi state 20 nung election agia liasü, 1977 küm Lok Sabha election den külemi state 17 nung election agi aser 1985 küm Lok Sabha election den külemi state 14 nung election agi. Ajisüaka 1989 küm nungbo Lok Sabha election den külemi state ishishi nung dang election agia arur.

'One nation, one election' nung tetsükdaktsü tulutibaji state balala nung assembly kümsük balala aliba ya asütsü. Taruba

Lok Sabha election 2029 küm agitsü, anungji iba mapang nungjibo state sorkartem ajak peipei kümsük abensar alitsüla.

2024 küm Lok Sabha election den külemi state 6 aser Union Territory ka nung election agi/agitsü, 2025 küm state 2 aser UT 1 nung election agitsü, 2026 küm state 4 aser UT 1, 2027 küm state 6 aser 2028 küm state 10 nung election agitsü.

Lok Sabha elections 2029 küm agitsü, anungji taruba ita ishika tsüngda sangdong agütsüra 2029 küm matongdangsa assembly election agitsü aliba kümsükji anentsütsü.

Union cabinet senden tembangba sülen osangbenertem den jembidang Information & Broadcasting Union Minister, Ashwini Vaishnav-i, cabinet-i committee report agizükogo saka kodang mapa küma benoktsüar mapang telatet melemet, ta ashi.

Vaishnav-i, "One Nation One Election indang high level committee-i benokba onüktem Union cabinet-i tanü agizükogo. 1951 nungi 1967 küm tashi election külemi dang agia liasü. Iba sülen 1999 küm Law Commission-i 170buba report ajanga, linük nung terenlok maneni alitsü, election mapang nnung sen teindokba ajema akümtsü, aser election mapang nung police aika mapa lemezüktsür, anungji tensa merakatsü atema küm pongu shia Lok Sabha aser legislative assemblies election ajak külemi dang agitsü benoka liasü," ta

metetdaktsü.

Paisa, "2015 küm parliamentary committee kati sorkar dang election ajak külemi dang agitsü benoka liasü. Iba atemaji taoba mapang Tir Ram Nath Kovind leniba nung high-level committee ka tentet. Committee-i stakeholders aika den asüngdangtepa asadangba sülen report agütsü. Linük nung election külemi dang agitsüji aikati pusema liasü. Ibayongji NDA sorkar cabinet-i item tebilemba onüktem agizükogo aser committee-i benokba ama shilem ana lemsar iba ya mapa küma benoktsü," ta metetdaktsü.

Paisa, "Joko committee-i benokba onüktemji linük nung sabang balala nung benoka o lemteptsü. Iba ya ajanga rongsenkettzüng kümzüktsü, tensa tajungba akümtsü aser ochimashi sen koma nokdangtsü, iba atemaji scientific tsütsülen nungi o lemteptsü. Iba sülen implementation group ka tenteta legal inyakyim atema jembitsü," ta metetdaktsü.

Lok Sabha aser state assemblies election ajak külemi dang agitsü atema committee-i linük temzüng nung Article 324A inoktsü benoka lir.

Linük temzüng nung temelenshi kar atema taküm asükwa mongpu Parliament nung benoktsü asü?, ta asüngdangba langzüdang Vaishnav-i, one nation, one election ya NDA sorkar kümsük mapang nungsa benoktsü, ta ashi.

### Kerala nung ano nisung ka dak Monkeypox putetogo

New Delhi, September 18 (Agencies): Bodhbarnü Kerala kübok Malappuram nung aliba hospital ka nung amonger arrshi küm 38 tebur ka dak monkeypox (Mpox) putetogo; pa Dubai nungi aruba sülen pa dak iba tashidak temaitsü liasü, ta State health department-i metetdaktsü.

Mongolbarnü state health minister, Veena George-i, nisungba jagi pa dak monkeypox temaitsü aliba metetba sülen pai par kibong züngsemtem dang nungi pilaa liasü, ta metetdakja liasü.

District health kettangser

kati ashiba agi, tebursangji tawa Dubai nungi Kerala-i aruba sülen shirangba agi nija hospital ka nung monga liasü.

"Iba sülen pa Manjeri Medical College-i anir ao. Pa dak monkeypox alitsü südi, ta melung melemi bilemba sülen onoki pa indang samples ji agizüka tendangtsü atema Kozhikode Medical College-i bener yoka liasü," ta health kettangseri metetdaktsü.

Taoba hopta Delhi nunga Haryana nung alir arrshi küm 26 tebur ka dak Mpox putetba sülen treatment agitsü atema Delhi sorkar indang LNJP Hospital-i anir ao.

### Jammu & Kashmir nung assembly election mezüngbuba shilem agiogo



September 18, 2024 nü Jammu & Kashmir nung assembly election mezüng anogo nung Anantnag nung PDP candidate, Iltija Mufti-i vote agütsüi polling station kati aodang tangokba noksa nung angur.

### Srinagar, Rongjui/ September 18 (Agencies):

Bodhbarnü Jammu & Kashmir Union Territory nung assembly election mezüngbuba shilem agiogo; nikongdang 5:00 ako tashi nung voters shilem 58.19-i vote agüja liasü.

Election Commission-i ashiba agi, voters shilem teimtibai vote agütsübaji Kishtwar liasü (shilem 77.23), Doda nung voters shilem 69.33, Ramban nung shilem 67.71, Kulgam nung shilem 59.62, Shopian nung shilem 53.64 aser Anantnag nung voters shilem 54.17-i vote agütsü.

Pulwama nungbo voters shilem 43.87-i dang vote agüja liasü.

Jammu & Kashmir nung election mezüngbuba shilem nung assembly constituency 24 nung election agi- Kashmir region nung menden 16 aser Jammu region nung menden 8 atema election agi. Election tanabuba shilem aser tasembuba shilem September 25 aser October 1 anogotem nung agiba sülen October 8 nü vote azüngtsü.

Jammu & Kashmir nung yimtenren party aika tsüngda tokteper aser independent candidates-a aika lir. J&K election nung National Conference aser Congress nati lokteper tokteper aser menden

kar nungbo party ana jagi peipei sasep nung tokteper.

2019 küm Jammu & Kashmir nung Arlla 370 agienba sülen tang mezüng election agir.

Delhi court kati interim bail agüja chioksang, Sheikh Abdul Rashid-i aniba Awami Ittehad Party-ia iba election nung tokteper.

Taküm Lok Sabha election nung Rashid-i Independent candidate ka ama toktepa pai Baramulla menden nung National Conference lenir, Omar Abdullah madak takok ngua liasü.

Rashid jail nung chiokba atema National Conference aser PDP lenirtemi BJP aitsüogo.

Bodhbarnü menden 24 atema candidate 219 liasü aser vote agütsütsü temsüa alir lakh 23 dak tali liasü.

J&K election mezüngbuba shilem nung tokteper tongti candidates rongnung CPI (M) nungi Mohammad Yousuf Tarigami, AICC general secretary Ghulam Ahmad Mir, National Conference nungi Sakina Itoo, PDP nungi Sartaj Madni aser Abdul Rehman Veeri na, PDP Tir Mehbooba Mufti'er jala Iltija Mufti, NC nungi Bashir Ahmad Veeri aser BJP nungi Sofi Mohammad Yousuf nunger densema lir.



Kullu district (Himachal Pradesh), September 18, 2024: Climate activist, Sonam Wangchuk-i linük temzüng Sixth Schedule nung Ladakh züngokang, ta takhangba agüja Ladakh nungi Delhi tashi aodang tangokba noksa nung angur.



## TIR YIMYIM YIMOBILEM (EDITORIAL)

DIMAPUR YANGTEPNÜ, SEPTEMBER (RONGJUI) 19, 2024

### Ayako aser Ayatai !

**A**senok aikati majangshi aser mangu saka Naga lima nung asen tsuraburtem aika kenyongi taochi maketba India sepaitemi ayako dena reshikangshiba agi temang nung atsükalok kaor timtemseta lir dipu limai ogo aser ano ayako agi sünger nisung aika tekangshi nung lir. Item dakji alaka, ano, nisung aika India sepaitemi dang masü saka Burma (Myanmar) sepaitemi dena yimtak aser arem nung shiruru ama arishia khaseta endokba Naga nung nokinketer teburchi temang zünger mezümgma kong sama-ar tereta mangu tanü tashi kinunger adianutembo mangyim jashi manenteti lir. Aji oda, India government-i par sepaitem amshia Naga nung tsübudaktsüba agi par nüken tsüba par temzüng ozüng kübok lidaktsütsü merangba taa-ji Naga nung asoshibo 'ayako' ta asütsüsa tarokroksü mapa aser mapang ka kümogo. Iba ama nisungi nisung mezümgokba mezümgmeshi mapa tamajungji nenshir amato, küm ana jakdang 2021 küm December 4 nikongdang Oting nung ali mijang atudak ayangertem, amongnübo pei kinungertem den külemi amungtsü atema, yimtaki meyipa oa alidang ajungbena ka dang India sepaitemi amakba lendong nung kenyongi tai maketba nisungtem khasetba tatalokbatem mamateti temulung shiranga alidang, tai maketba nisung khaseter sepaitem nemji tapet temerenshi agütsütsü melen India nung tematiba obendangdak Supreme court nung obendangertemia dena sepaitem mapajiang metentsüba Naga nung zübugang nung metsü mezütsür amai lir. Atangji, Nagaland government-ia Oting nung lendong atalokli Nagaland police nungi Special Investigation Team ka shima bushisüngdang mapa inyadaktsür külen, taochi maka tai maketba senso tajungtem khaseter India sepaitem anema okadak ken o agüja liasü. Ashiko, nisung asüba melen temenok amato asür aser yiruyiponger kibongtem nem senotsü teyari agütsür alitsüa akok. Ano, ashiko, asür kinungertem nem government mapaa agütsür alitsüa akok. Aji oda, Naga nung mulungzütsütsü atema yimten nunga maong tajung agütsür alitsüa akok. Ajisüaka, item jagi India sepaitemi tai maketba nisung shiruru memeyong khasetba mezümgmeshi mapa meküpdoktettsü. Aji oda, tamalen India sepaitemi Naga nung yim rongdoktsüba aser meimchir bang agibo ashitsüla masü reshikangshiba mapatema tanü tashi tashidak maka, konganga mulung animesüngzüktet lia alidang, Armed Forces Special Powers Act (AFSPA) ajanga agütsüba tashi amshia tanü tashi Naga nung tai maketba yimtaklirtem dena kasetyonga aoba mapa anema yabo Naga nung longjemer ola adok meshiogo. Asenoki aiben AFSPA indang jembio, anungji tangbo iba ozüng ajanga India sepai kati asen dak temulung melemi kisüng bilemba agi khaseta yutsü nunga Supreme court tashi nunga asenok temeten mangutsüsa asenok ya bendanger ozüng agi alena lir ta angteret alitsü. Atangji, ibai tangari alenba kisüng masü saka asensasa asen alenba mapa ka lir, kechiyong AFSPA ozüng ya state government temelaba melii tapi agi India government tashi amshia Home Ministry-i agütsütsü makok. Atangji, Nagaland nung ozüng raksar mali ta masü saka tetsübuttsü ozüng AFSPA ama amshia India sepaitem nem Naga nung khasetdaktsütsüba yabo maremteter. Iba ama yiar ozüng maliyonga, ozüng raksar aser nisung tamajungertem azüoktsü asoshibo tanga ozüng peria dang lir. Aji oda, kasa India aser kasa linük süra tanga state-tem nung mamshiba ozüng tamajung agi sensosangertem tsübudakja azüoktsü merangba ozüng ya asen state nunga mamshitsüla. Iba amaisa Naga nung nisunga masü amai amshiba ozüng aser mapa ya menokdangtet nungbo, ashiko, asüng AFSPA ozüng amshia Naga nung ajak dak temulung malemba agi Naga nung ajak khaseta endokyonga tebushir malitsü, kechiyong AFSPA-i yamaji inyaksü India sepaitem nem tashi agüja lir. Ibaibo 'party' otsü masü saka Naga nung taküma tangar meimchir taküm ama akümüka kümzüka ayutsüba otsü aser mapa indang lir. Ibai angatetra, Naga nungertemi Oinam, Mokochung aser Oting nung atalokba ayako aser ayatai otsü mamateti, temeten mangu tashi, bushitsü.

## OLEMSABANG

### TOKLANG TENZÜKER KÜMSÜK

- P.Renthy Jamir.

Tesüiba Asotem (Kümzüng noklang ka) nung asenok meimchir libaliru rebrangdangra süoshi maka mangsa chiyungtsü maka tepok sünga mechiyung mapabo anü tatsük tzünglu tesashi kecha hau ta mali anü adoker alu memeteti inyak. Mozü maka kechi agi shiranger memetet süma küm 70 tongteterbo koktena sar tantsür tambur ama liasü . Arishi küm 80 tongteterbo onsara temeki asü. Anungji Davidia arishi küm 70 tema alirtemjibo joko Tsüngrem yongsük nung arishir-rogo ta zülu südi.T, Ken 90-10 .Item ya yashi tashi asenok tenük agi nguogo anungji asenok tang aliba aso yabo TIA TAKA ASO ( Fortunate Centurians) ta ajar. Scientisttemi meimchir arishi talangba alitsü oset tapu jenti nguteta (Anti ageing Technologies) arishi langdaktsür. Küm 2000 nungi 2016 tashi nung küm 5.5 agi talangba arishi renlokogo (Global life expectancy up 5.5) ta world Health organisation ashir. Aser aji ajaki hau ta shiteter tashitak anüptsü mozü tematiba nguteta kio jen tajung nung merükmejua süoshi tajungba sobur vitamin aliba chiyungtsü achiba agi arishi langdaktsür. Anungji takar temeteter limatem nung arishi küm 100 alitsü ano küm metsü sülenbo 105 alitsü ta ashir. Aser Tsüngremia "Saka shiba küm noklang ka nung südir pa tebenjem mapang nung asü ta züngshutsü (will be thought a mere youth) Isa -65-20 pi takar lima apirbo India lima ya tajemzük lima ka lir. Saka 2001 census nung arishir older persons 75 to 93 years million 60 liasü aser 2025 nungbo arishir million 150 alitsü ta ashir Nagaland nunga 75 to 93 pur lakh ka tema liasü tangbo teimba lir.

Ano meimchir arishi alangtsü asoshi nungdak tulutibaji taküm pela-a alitsü tim. Anungji tanü alimai tepela anogomung International Day of Happiness 20th March nung amunger. Iba tepela anogomung ya alima nung takatiba lima Luxembourg koba lima nung per capita income nisung shia küm nung pei pei- i aah-a arutetba, 126427 Dollar atar iba nüburtemi tentetba masü , mesüra temeteter lima tashi tulutiba alima ajaki tsübuba America lima nüburi ngutetba masü , saka alima nung sensaktiba lima Bhutan koba lima per capita küm ka nung nisung shi 50 dollar dang bena aruteter aser governmenti par lima anütsü sepoy-a peria meyteter saka Bhutan nüburtemji teti pela-a alir.


Anungji Bhutan chuba Jigme Wangchuki par nübur tepela asadanger 20th March 1972 nung tepela angogo tenzüka lir. Kechiyong tepela yabo rongsen aika akaba agi angur masü tsükchir ajak akokba agi angur masü. Aser nisungka taküm nung arishi langdaktsüba tongtibangtibaji tepela ya lir. Aser nisung ka koma arishi talangba alir yamaji shisa takaba temetetba akümer ano pei tanela tekümtet asoshia tali Tsüngrem anasabai aor shin O nung yamai shia lir " We are all mortal but after the age of fifty men become consciously mortal. The older they get the more they realize the value of seconds". Nisung ajak tasütsü aso saka nisungi arishi küm tenem tashibo züzüua alir. Saka küm tenem süia aodangang aya ato ni ya tasütsü asoa na ta bilema aiter. Aser koma tain akümer yamaji süia aoba mapang asadanga rajemer. Tang meimchir Tia Taka Aso ka nung aliba agi arishi talangba alir anungji alima kin ajak government mapa inyaker küm talila sükloktsür. Kechiyong küm tainba akümdang mapa tali tajungba meteta inyaker.

1. England lima nung arishi küm 65 nung pension agüja aliba default retirement age tasür tetsür tebur ajak atema küm 66 kümtsür.
2. U.S.A nung dang tetsür tebur ajak arishi küm 66 nung pension aor . Ano 1960 sülen asortembo teimba kümtsütsü ta lir.
3. France lima nung küm 62 aliba French Senate adopts France retirement age 62 to 64 (13-3-2023) yanglushiogo.
4. China nung tebur küm 60 tetsür 55 pension oa aliba 2024 July nung China's ruling communist party lemtetba agi tetsür tebur anaprong atema retirement age küm 5 sükloktsütsü.
5. India nungbo kar küm 60 kar 62 karbo 65 kasa government mapa inyaker lawyer, Doctor, professor teimba Nagaland nunga doctortemi küm süklokjang ta lungkak aitogo. Ano private sectors companies balala nunga pension aoba. Küm balala lir .Assam State nungbo mapai aitsü upper age limit III & IV post atema küm 40 kümtsüogo (21-5-2018) Nagaland nung upper age limit küm 35 aliba Nagaland Police shimtsü atema küm 38 asütsü ta 24-8-2024 osang kakat nung sangtongba nguogo. State shia terara balala.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Rwanda linük nung ketdangsertemi Tenla ki aika shibangtsüogo



**September 18, 2024:** Rwanda nung sorkar ketdangsertemi Tenla ki aika shibangtsüba agi tangbo Khristanem aika kidang dang adenshia tekülem sentong agir. Taküm July aser August ita kija nung Tenla ki 10,000 jungnüa shibangtsüogo. Pentecost Arogo ka nungi tetsür kati, "Sorkari tekülem temeden magütsüba ajanga onok aoksar. Joko onoki ola madoki mimshia tekülem sentong agitsüsa kümogo. Onoki ola tashie adoka sarasadem mesüteter mesüra ken metenteter," ta metetdaksü.

Laisa Rwanda Tir, Paul Kagame aija, "Khrista osangtajung sangdongba nokdangba atema Tsüngremi pa merenshitsu," ta ashi.

2018 küm ozüng ka ajanga tekülem kitemji junga asütsüla, gari anendak alitsüla aser soundproof systems alitsüla, ta tuyua liasü. Kasa ozüng kübok pastor temji theology azüngba university degree alitsüla,

Arogotemi registrasion agitsüla aser parnok tesayuba tejangja metetdaksütsüla, ta tuyua liasü.

Human Rights Watch-i ashiba agi, alima nung meimchir temeden aser yimsü temeden anema inyakba yimsüsür tamajungtibatem rongnung Kagame densema lir.

Sorkar anema ola adokertem apur, azüker mesüra tepseter.

Ajisüaka sorkaribo ozüng taseñji yimsü anema masü saka Rwanda nungertem ochimashi aser ashikülak nungi kümzüksü atema lir, ta ashir.

Taküm July ita nung election nung Kagame-i maneni takok anguba sülen pai Arogotem dang nungi saru meshitsu telemtetba agiogo.

Arogotem aika tenzükba ajanga Rwanda nunger sensakertem ano tesensakba kümdaktsür, ta Kagame-i Arogotem nem tai tongloksü.

Rwanda nung Association of Pentecostal Churches nungi lenir kati, sorkar

ketdangsertemi Pentecostal Arogotem anema inyaker aser jelia osang memetdaksüi Tenla ki aika shibangtsüogo, ta metetdaksü.

"Pastor tem ket nung academic degree mesüra theology azüngba certificates mali, ta shia Tenla kitem shibangtsür. Tazüngba mesüra shisa akaba nung ajemdaker masü saka Tsüngremi Pa tenzüksü atema nisungtem jateter," ta pai metetdaksü.

Sorkari Arogotem anema inyakba agi association kübok Arogo aika underground churches kümogo, ta pa ashi.

"Tenla kitem shibangba ajanga onoki pei kidang dang adenshia mima tekülem agitsüsa akümer," ta paisa metetdaksü.

Rwanda nung nütsüng shilem 45 Catholic Khristanem aser nütsüng shilem 35 Protestant Khristanem lir. 2019 küm Rwanda nung Arogo 15,000 liasü saka registrasion agiba Arogotembo 700 shi dang liasü.

# North Korea-i meimchir aser yimsü temeden anema inyaker: CSW



**September 18, 2024:** Khristan melungtet telok Christian Solidarity Worldwide (CSW)-i North Korea nung meimchirtem temeden aser yimsü temeden anema inyakba sashia aitsüogo.

UN Commission of Inquiry-i North Korea nung meimchir temeden anema inyakba report ka sangdongba sülen küm 10 ajungba nungtem nung CSW-i 'North Korea: We cannot look away' report saya.

CSW-i, North Korea nung talisa Khristan yimsü anema inyaker aser Kim yimsüsüba anema ola adokertem nem temerenshi tulu agütsür, ta metetdaksü.

International meimchir temeden kümzükba ayutsü atema North Korea ketdangsertemi meinyaker, ibayongji coronavirus wara densema tatalokba balala ajanga North Korea nung tensa ano tamajungba kümogo aser China nung jenoka aliba North Korea nunger refugee tem tashiyim amshia tanaben North Korea-i yoker, ta CSW-i metetdaksü.

North Korea nung Kim yimsüsüba anema jembirtem reshikangshir, concentration camps nung ayur mesüra tepseter. North Korea nungbo Laishiba densema yimsü dak sendakba kaketterem amshiba

putetra kasa temerenshi agütsür.

North Korea nungi ajener nisung trok aser linük nung mongin 17 interview agiba sülen iba report ya renema liasü.

North Korea nungi ajener aser tang Khristan melungtet telok Open Doors nung inyaker, Timothy Cho-i, "Nisung meyirjang aika jail nung puokertem aser chiyungtsü peria magütsüi timtemdaksürtem nem temerenshi agütsütsüla. Ajisüaka China-i North Korea pusema lia tang Russia-ia North Korea pusemer, anungji ibaji tamakoktsü," ta ashi.

Open Doors nungi North Korea nungertem atema inyaker kati, North Korea nunger ozüng ajanga South Korea nunger sobalibatem aser bendanger osangtsüsang magizüktetba dang masü saka Khristanem aser Laishiba densema yimsü kaketterem magizükteter, ta ashi.

# ANOGO ABEN TSÜNGREM DEN

## Tanela Agi Baptiba

"Ajak Tanela ka nung baptitsü, aser asenok ajak Tanela ka nungi jemdaktsür."

**I Korint 12: 13.**

Khrista nung alir shia Tanela Temeshi nung baptitsü lapokja lir.

Ibai Tsüngremi asenok Pa dangi anir arutsü asoshi asenok den inyakba mapa ta agizüktsüla. Tasen Lai Osangtajung ajak nung Tanela nung baptitsü indang shia lir. Pentecost anogo nung Tanela temeshi tamangertem dangi yokbaji Yisu sarasadem langzüba lir ta agizüktsüla.

Shirnoki Khristaji Kümtetdakba ta agizüker pamok asoshi ibai inyaker. Tanelai asenok Khrista den ka Kümdaktsür. Ibai tekümtet nung mezüngbuba temoatsüji lir. Tamanger ajak den Tsüngremi kasa mapa inyaker. Iba tatalokba yagi asenok Khrista temang nung tendaktsür, saka ibai tebilemba agi masü tamang agi agizüktsüla. Tanela temeshi mapai asenok tzüraa kümdaktsür. Tzuraba jagi aintsü jangraba sayur. Ajemba jagi tzuraba metetba sayur. Tanela Temeshi mapai asenok shitakba nüngdakba dangi anir. Ochiba agizükba jagi nüngdaktem, tzuraba, ayaba aser tanela nung ainba nung yarir. Shibai tzurar Tanela lung nungi jemang aser taküm liang.

# Istanbul nung Tenla ki amaktsü atema sentong yanglur ka puogo



Viskhan Soltamatov

**Ankara, September 18 (Agencies):** Turkey nung ketdangsertemi Islamic State kiralongrar ka puogo; taküm küm tetenzüklen Istanbul nung aliba Santa Maria Italian Church amaktsü sentong yangluba nung pa densema lir, ta intelligence agency-i metetdaksü.

National Intelligence Organization (MIT)-i, taküm January 28 nü Tenla ki amakba nung tongti shilem agirtem rongnung, Viskhan Soltamatov densema lir ta melung malemer; Istanbul nung MIT aser police senteper mita aoba mapang nung pa apu, ta metetdaksü.

MIT-i, Tenla ki amakba mapang nung amshiba hadirtemji Soltamatov-i agütsü südi ta bilemer, ta pai ashi.

Taküm January ita nung Islamic State kiralongrar anati Istanbul nung aliba Italian Santa Maria Catholic Church amakdang Turkey senso ka khaseta liasü aser aika yiru.

IS den sendaktepa aliba Khorasan Province (ISKP) teloki iba Tenla ki amaktsü atema asalentong yanglua liasü.

Istanbul kübok Buyukdere kiyong nung Santa Maria Arogo Tenla kidang mamangertem (Khristanem) adenshia alidang onoki amak, ta Islamic State-i parnok sasa nangzük.

Amongnü Khristanemji tekülem sentong tagidak mapang nung kiralongrartem arua injang khaloktsü; iba tatalokba nung nisung ka asü aser aika yirua liasü.

Iba tatalokba sülen anogo ka lir police-i nisung ana apu; ka Russia nunger aser ka Tajikistan nunger liasü.

Tang Turkey linük nung Khristan nütsüng 25,000 shi lir. Yaküm June ita nungi tenzükba tang tashi nung sorkari Islamic State den tesendaktep alitsü südi ta melung meleme nisung 2,086 pua liasü aser iba nungjagi nisung 529 bo tepuokdak lir.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tang

(adv) iba mapang (now)

\* Ni tang nür kidangi arutsü.

Tanga

(adj) iba ya masü ( other one)

\* Moabai ni ashiba kaket masü tanga ka bener aru.

**OLONG PAITEP # 6928**

1		2		3		4	
		5		6		7	
8							
		9					
	10						
						11	12
		13				14	
15				16			

**TIPIEN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüingsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüing tajemtdak - (6)
- 12. \_\_\_ adenshi - (4)
- 14. Tsünüsenbongsü adokdak - (3)

**OLONG PAITEP # 6927 TELANGZÜBA**


**TIPIEN :**

- 1. Kasa, 6. Rangben, 7. Mait,
- 9. Poktet, 11. Ati, 13. Atasa,
- 16. Rür, 17. Rajang, 20. Lanu,
- 24. Nüngjem, 25. Süra.

**LANGTSÜNGLEN :**

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar,
- 12. Tinu, 14. Salem,
- 15. Aja, 18. Anünü, 19. Taju, 21. Ano,
- 22. Onü, 23. Kua.

**NAI-A YA METETTER MA**



Alima nung apu talangtibaji China Danyang-Kunshan Grand Bridge lir. Iba apu ya Beijing-Shanghai High-Speed Railway nung kilometre 164.8 talang lir. Iba apu ajanga Shanghai aser Jiangsu province nung Nanjing sendakteper.

Iba apu yangluba nung nisung 10,000 tema shilem agi aser küm pezü nung \$8.5 billion endoka yangluba sülen 2011 küm lapoka liasü. Guinness World Record nung China Danyang-Kunshan Grand Bridge ya apu talangtiba ta züngoka lir.

**Manipur nung Naga nunger Minister Washum'er ki amakba aitsür**



Imphal, September 18, 2024

(Agencies): Manipur nung Naga nunger tongti telok anati Naga nunger tanishir aser Cabinet Minister Khashim Washum'er ki amakba bushisüngdangtsü takhangba agütsüogo.

September 14 nü Ukhrl nung bomb amshia Transport Minister Washum'er ki amakba aitsür ta United Naga Council (UNC) aser Tangkhul Naga Long (TNL)-i metetdaksü.

Ukhrl ya Tangkhul Naga nunger teimba ser aliba tesem ka lir.

UNC-i iba tatalokba bangdakpurtemi jungjunga bushisüngdangtsü aser iba mapa inyakertem ozüing tesashitiba agi merenshitsü takhangba agütsüogo.

TNL-ia September 16, 2024 nü Ukhrl district headquarters nung iba tatalokba aija sentong

ka ayonga agiogo aser district commissioner nem memorandum ka agütsü.

Iba memorandum nung aibelenertem aputsü, public safety measures takangba inyaksü, Ukhrl-i non-locals aruba mita reprangtsü aser tongtipang lenjemtem nung CCTV cameras enoktsü takhangba agüja lir.

Iba tatalokba nung nisung yiruba mesüra asüba kecha maliasü saka bomb pokdaksüba ajanga yimsüsürtem aser sensotem security atema tasüngdangba aika adokogo ta Naga nunger tanishirtemi ashi.

Tang tashi nung iba tatalokba atema telok mesüra kija shingaia tenüing agiba osang mali.

Iba tatalokba atema Naga People's Front (NPF), Manipur State Unit, Tangkhul Katamnao Saklong (TKS), Tangkhul

Mayar Ngala Long (TMNL) aser Raphei Katamnao Long (RKL) teloktemi aitsüba metetdaksüogo.

NPF-i iba mapa ya meimchir taküm mapayui inyakba mapa ka ta aitsüogo aser nübertemi ozüing alema ayongzüikogo.

TKS-ia lokti nung tensa raksatsütsü atema mebilemdangi iba mapa inyakogo ta aitsü.

Iba lendong nung nisung yiruba mesüra asüba kecha maliasü saka par kibong aser lokti asoshi tetsübu bentsür aruogo ta parnokisa ashi.

TMNL aser RKL teloktemi kasa olen metetdaksü aser bomb amshiba ya Minister anema dang masü saka iba tesem nung yimjung aser security anema inyakba mapa ka lir ta parnokisa ashi.

**Süpokrem meshiba atema CWC JE ka apu**

Guwahati, September 18, 2024 (Agencies): Central Bureau of Investigation (CBI)-i Assam nung Central Water Commission (CWC) nung ketdangtsür ka puogo.

Cachar district nung Junior Engineer (JE) kati gari shishilembar ka dang nungi Rs 12,000 süpokrem meshia agiba atema apu.

"Tanü onoki Ayush Kumar aser tanga sorkar ketdangtsürtem anema FIR ka benok. CWC, Silchar-i gari ka hire süa amshiba atema Rs 1.55 lakh magütsü aliba agütsütsü asoshi parnoki gari shishilembar ka dang nungi süpokrem meshi" ta CBI-i tanü ashi.

Iba ken o nung ajemdaker CBI-i tasa ka atong aser Junior Engineer (JE)-i Rs 12,000 meshia agidang apu.

कर्मचारी राज्य बीमा निगम  
(एन एच ईएसआई मंत्रालय भारत सरकार)  
EMPLOYEES STATE INSURANCE CORPORATION  
(Ministry of Labour & Employment, Govt. of India)

क्षेत्रीय कार्यालय, पूर्वीय क्षेत्र  
REGIONAL OFFICE, N. E. REGION  
बामुनिमाईदाम, गुवाहाटी-781021  
BAMUNIMAIDAM, GUWAHATI-781021  
वेबसाइट/ Website: www.esic.nic.in  
ईमेल/ Email: smo-ner@esic.nic.in

**mIMP Scheme kübok ESIC nung empanelment atema Private Practitioners, Local Chemist aser Local Diagnostic Centre nungi online application meshir**

Nagaland state atema District Head Quarters 1. Kiphire 2. Longleng 3. Mon 4. Noklak 5. Peren 6. Tseminyu 7. Phek 8. Tuensang 9. Wokha 10. Zunheboto 11. Chumoukedima 12. Niuland asoshi Private Practitioners, Local chemist aser Local Diagnostic Centre nungi ESIC kübok mIMP Scheme nung empanelment atema ESIC Regional office, Guwahati ajanga online application meshir.

**Online application ya 30.09.2024 tashinung agütsütetsü.**

**Metetpelaüba lira ESIC Regional Office, Guwahati den tongteprateptsü akok.**

Address: Panchdeep Bhawan, ESIC Regional Office, Bamunimaidam, Guwahati-781021  
Email: rd-assam@esic.nic.in. Advertisement tejangja website <https://www.esic.gov.in/tenders> nung Console number 12122/2024 nung bushiba nung angutsü.

CBC 23123/12/0010/2425 Regional Director (I/C)  
ESIC R.O., Guwahati

**GOVERNMENT OF NAGALAND  
DIRECTORATE OF HEALTH & FAMILY WELFARE  
NAGALAND: KOHIMA**

No.DHFW-5/D.Pharm/Part-II/2014/8170-74 Dated, Kohima the 18th Sept'2024

**NOTIFICATION**

With reference to the Letter No.2024/AMC/IP/396/Date: 14/08/2024, the following Candidates are selected on 17th Sept'2024 to undergo Diploma in Pharmacy (D.Pharm) course at Assam Medical College, Dibrugarh for the Academic session 2024-2025. The following Candidates are provisionally selected through Academic Merit Marks.

Acceptance Letter may be submitted to the Office within 5 days from the date of issue of the Notification. Waiting List will be maintained for a period of 3 (Three) months w.e.f the date of issue of this result.

<p><b>Selected List</b></p> <ol style="list-style-type: none"> <li>1. Eyilobeni P. Shitiri</li> <li>2. Shahren N. Vomshakhu</li> <li>3. KhriezosienuoPesochü</li> <li>4. RampausuiliePoirang</li> <li>5. Loli K. Zhimo</li> </ol>	<p><b>Waiting List</b></p> <ol style="list-style-type: none"> <li>1. SangamlakNeume</li> <li>2. KekhushutoZhotso</li> <li>3. E. ThungbeniNgullie</li> <li>4. E. LoshumloNgullie</li> <li>5. Sarah Tep</li> </ol>
---	--

Sd/-  
**DR.E. MOTSUTHUNG PATTON**  
Principal Director  
Directorate of Health & Family Welfare,  
Nagaland: Kohima.

# North Korea-i ano short-range ballistic missiles tendang



**Seoul, Rongjui/September 18 (Agencies):** North Korea-i linük anütok tzüküm len nungi short-range ballistic missile ishika khaketa yokogo, ta Korea aser Japan nati metetdaksü. Hopta ka tsungda tang agi tanabenbuba North-i missile tendangogo.

Missile tem ya linük yimtiba Pyongyang north len Kaechon nungi Bodhbar anepdang 6.50am shi nung yok aser northeast leni km 400 (249 miles) shi yima oa liasü, ta South Korea indang Joint Chiefs of Staff (JCS)-i ashi, ajisüaka missile kwi tendang mesüra item missile tem kong tsük iba indang osang tejangja magütsü.

“North Korea-i missile tendangba ya tangar rongshiba inyakyim ka lir aser iba ajanga Korean Peninsula nung yimjung aser tamendakdak amokmerener aser onoki iba inyakyim ya aitsür,” ta JCS-i ashi.

Japan-ia missile tendangba jangjashitsüogo aser coastguard-i ashiba agi, North Korea-i ballistic missiles ana tendanga liasü.

North Korea indang foreign

minister aser Russian security official Sergei Shoigu na Moscow nung ajurutebpa sülen anogo ishika lir tang iba missile tendangogo.

Tenokdangba tesashi agütsür aliba linük ana ya tawa tesendaktep kanga akanga yanglushia arudar aser ken o asadangertemi ashiba agi, Ukraine den rara nung amenshitsü atema North Korea-i ozüing alema Russia nem prangbong injang aser hadir balala agüja aliba dak iba tetendangba ya sendaka alitsü akok. Ajisüaka Pyongyang-i, Moscow nem prangbong injang aser hadir kecha magütsü ta shia arudar.

“Ukraine nung asendenshir rara tesashiba akümba aser Shoigu-i tawa North Korea semdangba asadanga tang missile tendangba ya Russia-i yoktsü atema asütsü akok,” ta Seoul nung University of North Korean Studies indang tir Yang Moo-jin-i AFP news agency dang ashi.

Pyongyang-i ita ana dak tema lir taoba Brehostibarnü short-range ballistic missiles

aika tendangogo aser mapang tatsüka lir ashiba agi, parnoki 600mm multiple-launch rocket system tasen ka tendanga liasü.

Rongsen aser tanga military teyari melena Moscow nem rocket aser missile tem agütsüba atema United States, South Korea aser Ukraine nungeri Pyongyang aija arudar. Conflict Armament Research-i taoba ita sangdongba report ka nung missile teraksa asadanga sülen North Korea nung taküm yangluba missile tem Kyiv den raraba mapang amshiba ngutetogo, ta shia lir.

United Nations sanctions monitors-ia taküm küm tetenzüklen, Russia-i January ita Kharkiv amakba sülen North Korea indang Hwasong-11 missile teraksa nguteta liasü, ta metetdaksü.

North-i uranium enrichment facility indang mezüngbuba noksa sayaba sülen Bodhbarnü missile tem ya tendangogo.

North Korea-i 2006 küm mezüngbuba nuclear hadir tendang aser iba sülen parnok nem UN-i tenokdangba agütsür lir.

## MENUNGRA BILEMTETER

Tetsüi asoba arishi tatsü. - Yob 14:1



TASOBA  
03.08.1982

TASÜBA  
19.09.2023

Kodanga amatsü makokba temeim jabaso Rongsentemsü (Süngratsü). Ojalaibo, ni toktsür mao kü den küm aika alitsü ta imla liasü, saka nü tia agi ya dang tiatsü nungji anojungi tasübai na bener oadokogo. Saka na maliyonga nü temeim, nü yimya aser sempet tajung kodanga mamatsü. Na merongjeni liangma.

Tatem nung Ojala aser Kinungertemi Salem.

## MULUNGNEN O



TASOBA : 1933 – TASUBA: 10.09.2024

Tsurabur **ASÜR MERENTEMJEN** (Chuchuyimlang) September 10, 2024 anogo, akumli wadang temer teti alitsuba anisungzudaki ogo. Onok shisabulu aser mangyim tia nung alidang kija, kibong, kiyonger, Arogo, temeimer aser lokti palalai tamang sarasadem den nubu, shisatsu aser alirongsen agi yariba asoshi nenok ajak dang pelaba metetdaksur.

Ano shirnokisa tetsu tasoli tashi yaritepa aruogo, kanga pelar. Teyanglur Tsungremi nenok ajak moajangma.

Temeim kinungtsu, Chirnur, Semchir & Kinungertem

# Lebanon nung pager apokba atema Hezbollah-i Israel tenüing asener

**Beirut, Rongjui/Sept. 18 (Agencies):** Osangtsüsang agitsü atema Hezbollah telok züngsem temi amshiba pagers noklang aika Lebanon tesem balala nung apokdang tanur ka densema nisung toku asü, ta iba linük indang health ministry ajanga ashi.

Beirut aser danga region balala nung mapang kasashi nung iba oset apokdang nisung 2,800 yiruba nung Iran indang ambassador to Lebanon dena liasü.

Iran-i yariba Hezbollah teloki, pagers ya Hezbollah units aser institutions balala nung mapa inyakerem indang lir ta ashi aser par sepai ti süogo ta jangjatsü.

Iba telok yagi Israel tenüing sena ibai “criminal aggression” lir ta ashi aser tayang kepzüksü nangzük. Israel mitkari telangzüba kecha agüja mali.

Iba lendong ya ataloktsü ghonda ishika lia Israel indang security cabinet-i tesem balala nung prokshia aliba nüburtem kidangi meyipa shilangtsü atema Hezbollah-i linük north tsütsü amakba anendaktsütsü

ya ketdangsür indang rara nükjidong lir, ta shia liasü.

Gaza nung October 7 nü Israel aser Hamas tsüngta rara tenzüker Israel-Lebanon arütsülen anogoshi amai khatepa arur.

Parnok ya Iran-i yariba Palestine nunger telok bhukuma intaker, ta Hezbollah-i shiogo.

Bodhbarnü Hezbollah-i sangdong ka nung parnok Gaza bhukuma operation agitsü aser ibai Mongulbarnü nisung aika tepsetba langzüa tsükchir tem taa asütsü, ta ashi.

Israel, UK aser danga linük temi Hezbollah aser Hamas ya kiralongrar telok ta tenüing jalokja lir.

Mongulbar nikongdang Lebanon nunger aika aoksar aser mamangteti liasü, kechiaser iba ama lendong ya taoba mapang kodanga matalokdangi liasü.

Pagers aika nikongdang 3:30 ako meta linük yimtiba Beirut aser danga tesemtem nung apok, ta ashi. Mobile phone tem hack asütsü mesüra tsüngsü aputsü kanga temela,

anungji parnok osangtsüsang agiteptsü atema iba oset nung metaloka lir.

CCTV video ka nung nisung ka supermarket nung pa indang juli mesüra pocket nung apokdang pa ali nung laoa ola adoka liasü aser dangar tem atsüktsü meranga liasü.

Ghonda ishika sülena ambulance nung nisung aika anir mozüki tem sünga adenshi aser item rongnung nisung 200 kangasa sashia yirur lir ta health minister-i metetdaksü.

Iba pager apokba nung nisung timba teperem, tejak, tenük aser teka yirur lir.

Iranian ambassador Mojtaba Amani kinungtsüi la kinungbo tera yiru aser mozüki nung tajungba lir, ta ashi.

Hezbollah indang media office ajanga par sepai ti asüba sangdongogo. Parnok ya kong aser kechi tia nung asü, ajibo mashi saka parnok ya Jerusalem-i aoba lenmang nung linük asoshi takum tenlartem lir ta ashi.

Asürtem rongnung Hezbollah MP Ali Ammar’er jabaso aser Hezbollah

züngsem ka jala arishi küm ter tain ka dena lir aser tena ya Bekaa Valley nung asü ta ashi.

Mapang tatsüka lir ano ozüing yanglur Hassan Fadlallah’er jabaso ka süogo ta sangdonga aliba tasübo masü saka yirua lir ta ashi.

Kidanger linük, Syria nunga pagers apokba nung nisung 14 yiru, kong Hezbollah ya sorkar indang sepaitem den külemi civil war nung rarar, ta UK nung amenoka aliba Syrian Observatory for Human Rights ajanga ashi.

“Iba mapa tamajung atema onoki tsükchir Israel tenüing asener,” ta Hezbollah-i Mongulbar nikongdang sangdong ka nung shia liasü.

Lebanon Ato Kilonser Najib Mikati-ia iba lendong atema Israel tenüing asen aser ibai Lebanon temeden nung aibelenba aser jenjang ajak nung mapa tamajung lir, ta ashi.

Iranian Foreign Minister Abbas Araghchi-ia Israel nunger kiralongraba khukhua alitsür ta Lebanon foreign minister dang shiogo, ta ashi.

Israel indang tembar tajungtiba, US-i kecha nunga shilem agia mali ta shiogo aser Iran dang tensa tamajungba mekumdaktsütsü ajungshia liasü.

Pagers ya kechi ajanga apokar Hezbollah-i mashi.

Mongulbarnü apokba oset ya tawa Hezbollah-i alibatem lir, ta osang kar ajanga ashir.

Pager indang lithium-ion battery tali atsükba nungi mi adoktsü akok, saka pagers hack süa tatsük kumdaktsüba ajangabo yamai mapoktsü, ta mongin temi ashir.

Israel-i Hezbollah anema ita ishika cyber operations inyaka arur, saka iba security breach ya tulutiba alitsü, ta UK nung aliba Chatham House think tank nung Middle East analyst Lina Khatib-i ashi.

Israel mitkari Mongulbar nikongdang sangdong ka agütsüba nung pager apokba indangbo mashi saka chief of staff Lt Gen Herzi Halevi-i commander tem den tesem ajungalen raratsü aser defence atema renema alitsü asoshi tensa asadangtepa liasü ta ashi.

## NSF MM Trophy: Nousi Rüzhi, Khrietho FC & Kohima College nungeri takok angu

**Kohima, Rongjui/September 18 (TYO):** Angami Students' Union-i ayongzuka Indira Gandhi Stadium Kohima nung tang asaya aliba 24buba NSF MM Trophy nung Bodhbarnü Nousi Rüzhi, Khrietho Football Club aser Kohima College Kohima nungeri pei tata asaya kokogo.

Bodhbarnü mezüngbuba asaya nung Nousi Rüzhi (Colleges)-i goal 3-2 agi New Reserve Youth Organisation (NRYO) koka liasü.

Nousi Rüzhi atema Kedolhouvo Naprantsu, Kedovituio Miasalhou aser Vikerütuo Tachü nungeri minute 11, 51 aser mapa apuloktsür asayaba mapang goal idakja liasü.

Kasa mapang nung NRYO

atema Mezuzhoulic Zashümo-i minute 33 aser 68buba nung goal ana idaktsü. Iba asaya atema pa nem player of the match naroküm agüja liasü.

Tanabuba asaya Khrietho FC, Meriema aser Jalukie Town YO na asayaba Meriema team-i goal ana agi kokogo.

Asaya nung mezüngbuba goal ya Boresh-i minute 4buba nung idaktsü aser tanabuba goal ya Peteviso Kezieo-i minute 42buba nung idakja liasü. Iba asaya atema Peteviso Kezieo nem Player of the match naroküm agütsü.

Maneni tasembuba asaya nung Kohima College, Kohima-i goal 3-1 agi Halcyon FC koka liasü.

Asaya mezüngbuba shilem

nung goal ka danga magütsüteri asayaba sülen Kelevi Seyie-i minute 46buba nung mezüngbuba goal idaktsü aser iba sülen Pauzie Haikuibe-i minute 64buba aser minute 69buba nung par team atema tanabuba aser tasembuba goal idakja liasü.

Halcyon FC atema goal ka ya Mangkholen Kuki-i minute 66buba nung idakja liasü.

Iba asaya atema Kohima College nungi asayar Menuokhrielie nem man of the match naroküm agüja liasü.

**September 19 nü asayatem:**

1. Sahei FC vs Asufü Christian Institute @ 9:30am
2. ONYX Titans FC vs Pehlum Lamhil L.A. @ 11:30am
3. Delai FC vs Khrietho FC @ 1:30PM.

## Ricky Ponting Punjab Kings head coach kümogo

**Mumbai, Rongjui/September 18 (Agencies):** Taoba mapang Australia team captain Ricky Ponting 2025 küm IPL-i meyipa arutsü aser tangbo pa Punjab Kings head coach ama mayipa arutsü.

Punjab Kings puri 2008 küm iba asayamung tenzükba sülen tang tashi nung khen danga takok ngua mali. Ponting-i England nunger Trevor Bayliss melentsü, shiba taoba IPL season ana tashi Punjab indang head coach liasü. Pa coach asüba mapang Mohali nung amendaker aliba club yagi playoffs dena tonga masayatet.

Osang ajanga ashiba agi, Australia nunger nungtugu asayar shiba taoba küm tenet tashi Delhi Capitals den sendaktepa liasü aser iba masüdüng Mumbai Indians den sendaktepa liasü, pa IPL team asem den sensaksema liasü, saka tatem nung Punjab Kings pur shimogo.

Club indang head coach asütsü Ponting shimba dak sendakba nung Punjab Kings CEO Satish Menon-i, "taruba season pezü ozü team yanglushia len anitsü atema Ricky onok den densemba atema pelar. Pa tajangshibatem ya team takok asoshi squad tajung ka tentetsü atema kanga tongtibang asütsü. Pa international jenjang nung coach mapa inyaka senzüba aser television pundit ka ama inyakba ya taküm mega auction mapang asayatem shimtsü asoshi kanga tongtibang asütsü. Pa dak cricket asayar aser lenir anitetsü atema sempet tajung aliba ajanga onoki takok nguyonga aoba nung tongtibang shilem agütsü," ta ashi.

Kasa mapang nung Ponting-i ashiba agi, "Head Coach mapa abentsü atema Punjab Kings puri maongka agütsüba atema pelar. Mera

tasen ka agütsü atema yongya atar. Ni club kibur aser management den tarutsü dak sendakba nung sensaksem tajung kaogo, aser team asoshi onok nükjidong kasa dang aliba ngua kanga pelar. Onoki fan tem nem meyipa agütsüner aser tarutsü nung Punjab Kings pur ya khenyongi balaka asütsü ta tenanzükba agütsü."

Ponting lenisüba nung Delhi Capitals pur 2020 küm mezüngbuba IPL final tonga liasü aser 2019 aser 2021 kuma playoffs tonga asayaogo.

Tawa Major League Cricket nung Washington Freedom pur takok dangi aniba sülen Sky Sports Podcast nung jembiba mapang arishi küm 49 tain coach yagi, pa international coaching shilem agütsü kecha tebilemba mali ta ashi, saka DC toktsüba sülen Indian Premier League nung maongka dang ngura inyaksü tejangraba aliba indang lemsatapa liasü.

## Marseille-i France nunger International asayar Rabiot alizükogo

**Rongjui/September 18, 2024 (Agencies):** Marseille-i Mongolbarnü sangdong ka ajanga France nunger international midfielder Adrien Rabiot den tenanzüktepba yangluba metetdaksüogo.

July ita Juventus toktsüba sülen Rabiot ya free agent ka liasü. Pa Juventus nungi küm pongu asaya aser iba mapang 2020 Serie A title aben aser Italian Cup ana koka liasü.

"Adrien Rabiot den tenanzüktepba yangluba Marseille-i pelashishia sangdonger. Arishi küm 29 tain asayar yagi medical tetendangba ajangetba sülen contract tasen ka sign süogo," ta Ligue 1 indang club yagi ashi.

Taoba mapang Paris Saint-Germain nung asaya aliba asayar den ya küm kwi atema

tenanzüktepba yanglu, iba indang osang tejangja magütsü, saka ken o jangja aliba source kati AFP dang Deobarnü ashiba agi, pai küm ana atema tenanzüktepba yanglutsü imlar.

Rabiot-i France tenüng nungi 48 ben asayar lir, aser Qatar nung taoba World Cup nung tanabuba jenjang nung tembangba France team nung pa-a densema liasü.

Kasa mapang nung pa Euro 2024 nunga ponguben asayaogo, kong France pur semi-finals nung Spain-i tsükdakja liasü.

Hombarnü nikongtsütsü Rabiot ya Marignane airport nung Marseille pusemertemi agizüka liasü. Parnoki pa tenüng ayimba den flare tsükloka pa agizüka liasü.

"Iba yabo imla maliasü. Idaki nisung paikaya ngua kanga pelar. Ozü kibonga kanga pela alitsü ta ni meteta lir. Iba yagi takok tashi meranga asaya-a takok nguner," ta pai ashi.

Marseille pur coach tasenba Roberto De Zerbi lenisüba nung season kanga junga tenzükogo aser Honibarnü Velodrome stadium nung Nice akokba asaya ya nisung 65,000-i repranga liasü.

De Zerbi-i, season tatem arishi küm 22 tain Mason Greenwood anir aru aser pai league asaya pezü nung goal pongu idaktsür lir.

Rabiot ya Deobarnü Lyon den asayaba mapang asayadaksütsü akok. Pa Euro asayaba sülen khen danga asaya mali saka iba asaya nung asayadaksütsü imlar.

कर्मचारी राज्य बीमा निगम  
श्रम एवं रोजगार मंत्रालय भारत सरकार  
EMPLOYEES' STATE INSURANCE CORPORATION  
Ministry of Labour & Employment, Govt. of India

क्षेत्रीय कार्यालय, पूर्वी क्षेत्र  
REGIONAL OFFICE, N. E. REGION  
बामुनीमैदाम, गुवाहाटी-781021  
BAMUNIMAIMAM, GUWAHATI-781021  
Website: www.esic.gov.in, Email: smo-ner@esic.nic.in

अरुणाचल प्रदेश, असम, मेघालय, मणिपुर, मिजोरम, नागालैंड और त्रिपुरा राज्यों में कर्मचारी राज्य बीमा निगम के लाभार्थियों को सुपर स्पेशलिटी चिकित्सा उपचार और जांच सुविधाएं प्रदान करने के लिए सरकारी / अर्ध सरकारी / पीएमजेएवाई / सीजीएचएस पैनेलबद्ध / निजी अस्पताल / निदान केंद्रों से पैनेल में शामिल होने के लिए अर्जी की मांग (ईओआई)

**Arunachal Pradesh, Assam, Meghalaya, Manipur, Mizoram, Nagaland & Tripura state tem nung ESIC Beneficiaries tem nem Super Specialty Treatment aser Investigation facilities agütsütsü atema Govt. / Semi Govt./PMJAY/CGHS Empanelled / Private Hospitals / Diagnostic Centres Empanelment asoshi Expression of Interest (EOI) benoker.**

Regional Director, ESIC Regional Office, Panchdeep Bhawan, Bamunimaidam, M.R.D. Road, Guwahati-21nungi Arunachal Pradesh, Assam, Meghalaya, Manipur, Mizoram, Nagaland & Tripura nung amenoka aliba Government / Semi Government / CGHS Empanelled / Private Hospitals / Diagnostic Centres tem nungi Expression of Interest (EOI) jaoker, koba CGHS rate dak ajemdaker cashless basis nung ESIC Beneficiaries tem nem Super Specialty Treatment aser Diagnostic Services agütsütsü atema lir.

Osang tejangjaba agütsü artema jangra aliba Health Care Organizations (HCOs) temi website [www.esic.gov.in/tenders](http://www.esic.gov.in/tenders) Console No. **12092/2024** mesüra [www.eprocure.gov.in/eprocure/app](http://www.eprocure.gov.in/eprocure/app) Tender ID: **2024\_ESIC\_822567\_1** semdangtetsü.

EOI (Online) benoktsü atema tatembangbuba anogo aser mapangji: **20-09-2024; 05:00 PM** tashi.

CBC 23123/12/0006/2425

कर्मचारी राज्य बीमा निगम  
(श्रम एवं रोजगार मंत्रालय भारत सरकार)  
EMPLOYEES' STATE INSURANCE CORPORATION  
(Ministry of Labour & Employment, Govt. of India)

क्षेत्रीय कार्यालय, पूर्वी क्षेत्र  
REGIONAL OFFICE, N. E. REGION  
बामुनीमैदाम, गुवाहाटी-781021  
BAMUNIMAIMAM, GUWAHATI-781021  
वेबसाइट/ Website: www.esic.nic.in  
Email: smo-ner@esic.nic.in

**mIMP Scheme kübok ESIC nung empanelment atema Private Practitioners, Local Chemist aser Local Diagnostic Centre nungi online application meshir**

**Nagaland state atema District Head Quarters 1. Kiphire 2. Longleng 3. Mon 4. Noklak 5. Peren 6. Tseminyu 7. Phek 8. Tuensang 9. Wokha 10. Zunheboto 11. Chumoukedima 12. Niuland asoshi Private Practitioners, Local chemist aser Local Diagnostic Centre nungi ESIC kübok mIMP Scheme nung empanelment atema ESIC Regional office, Guwahati ajanga online application meshir.**

**Online application ya 30.09.2024 tashinung agütsütetsü.**

Metetpelnäba lira ESIC Regional Office, Guwahati den tongteprateptsü akok.

**Address:** Panchdeep Bhawan, ESIC Regional Office, Bamunimaidam, Guwahati-781021

**Email:** rd-assam@lesic.nic.in

Advertisement tejangja website <https://www.esic.gov.in/tenders> nung Console number 12122/2024 nung bushiba nung angutsü.

**Regional Director (I/C)  
ESIC, R.O, Guwahati**

CBC 23123/12/0010/2425

EMPLOYEES' STATE INSURANCE CORPORATION  
REGIONAL OFFICE, N.E. REGION, GUWAHATI  
BAMUNIMAIMAM, GUWAHATI - 781021 (ASSAM)

**Contract basis nung Part Time Medical Referee Engagement atema jaoker**

Teküboklen agüja aliba tesemtem nung küm ka atema contractual basis nung Part Time Medical Referee indang engagement atema agüja aliba format nung Applications tem jaoker:

1. Guwahati 2. Chandrapur 3. Amingaon 4. Bongaigaon 5. Goalpara 6. Dhubri 7. Barpeta 8. Nalbari 9. Tezpur 10. Nagaon 11. Jorhat 12. Numaligarh 13. Tinsukia 14. Dibrugarh 15. Silchar 16. DCBO Mangaldoi 17. DCBO Itanagar 18. DCBO Imphal 19. Aizawl 20. Shillong 21. Byrnihat 22. Dimapur 23. Agartala

**Experience:** Senior Medical Officer of State Govt. / Senior most IMO of the Centre / Retired Medical Officer. (Retired Medical Officer kaji **21.10.2024** nü tashi nung arishi küm 63 tekübok asütsüla.

**Qualification:** Recognized university mashi ka nungi M.B.B.S aser MCI / State Medical Council nung züngoksema alitsüla.

\* Advertisement tejangjaba metetsü atema ESIC website: [www.esic.gov.in/Recruitments](http://www.esic.gov.in/Recruitments) mesüra console number **.9779/2024** amshia ESIC website <https://www.esic.gov.in/recruitments> semdangang.

**Regional Director (I/C)  
ESIC, RO, Guwahati**

CBC 23123/12/0012/2425

**BILEMDANGANG**  
"Anema linüra libaliro melenshiang."